



**Ika-Kawhaag-Unom nga Dominggo
sa Kasarangang Panahon
(Nasudnong Adlaw sa mga Magdadagat)
Septyembre 28, 2014**

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus, Pinaagi sa Gagmayng Simbahanong Katilingban, makaambitsa Misteryo sa Pasko pinaagi sa mapahiubsanon ug maalamong pagpalambo sa gugmang radikal diha sa personal ug katilingbanong responsibilidad!

Sa mapadayonong pamalandong bahin sa atong matohuong tubag, ang PKP - II karon nagtutok sa laing punto niining han-ay sa mga tubag: Ang pagpakig-ambit diha sa Pag-antos, Kamatayon ug Pagkabanhaw ni Jesus. Matud pa sa PKP-II:

“4. Pagpakig-ambit sa Misteryo sa Pasko

(83) Mao man gani nga dili mahimong ang usa ka Kristiyano dili magtagad sa pag-antos ug sa kawad-on, in hustisya ug pagkabahin-bahin. Kita nasayud nga ang pag-antos dili hingpit nga maibot samtang kita ania pa dinhi sa yuta. Apan kini mahimong ikunhod. Ug kini makunhod dili pinaagi kanilang nagbayad sa dautan pinaagi sa dautan kondili kanilang andam sa pagbuntog sa dautan pinaagi sa maayo, ug buot makig-ambit sa mga alantuson sa ilang mga isigka tawo.

(84) Walay sala si Jesus apan gipas-an niya ang atong mga pag-antus. Ang iyang mga pagpalagpot sa mga yawa ug mga pagpanambal mao’y katumanan sa mga pulong ni Isaias, ‘...ang atong mga kahuyangan iyang gipas-an, ang atong mga pag-antus iyang gilahutay...’ Iyang gidawat, diha sa gugma ug sa pagsunod sa

Iyang Amahan, ang sangputanan sa sala nga mao ang kamatayon pinaagi sa paglansang sa krus. Pinaagi niining mahigugmaong pagdawat ug pagkamasulundon, Iyang giusab ang dautan ngadto sa pagkamaayo: ‘sa imong pagkamatay imong gilaglag ang among kamatayon, sa pagkabanhaw imong gipahiuli ang among kinabuhi’.

(85) Kini mao ang Misteryo sa Pasko ni Jesus ug pinaagi niini Siya nagdala kanato ngadto sa iyang Paglabang gikan sa pag-antos ngadto sa himaya, gikan sa kamatayon ngadto sa kinabuhi, gikan sa atong tawhanong pagkamakasala ngadto sa iyang grasya. Dinhi niining misteryo kita isip iyang mga tinun-an kinahanglang moambit, dinhi atong makaplagan ang ritmo ug sumbanan sa atong kaugalingong kinabuhi.

(86) Ang Ginoo nagtawag kanato kanunay sa pag-usab sa pag-ingon nga ‘Dili’ sa atong kaugalingong kasaypanan ug mga istrukturang makasasala, ug sa pagtambayayong nga mga alantuson sa mata’g usa diha sa gugma. Kini nga pagpakig-ambit sa iyang Misteryo sa Pasko magpatakus sa uban sa pagpuyo, aron nga sama kang San Pablo kita makaingon: ‘Ang kamatayon naglihok dinhi kanato, apan ang kinabuhi, kaninyo.’ Sa pagkawagtang sa atong kinabuhi niining paagiha, maluwas man hinoon nato kini ug motubo kita sa atong pagkadisipulo ni Jesus.”

Unsaon kaha pagsabut sa kabus nga naglisud makakaon ug husto katulo sa usa ka adlaw ug amgo sa mga hinungdan sa ilang pag-antus ug pagpanglupig kining bahina sa PKP-II: “pagpakig-ambit sa Misteryo sa Pasko”? Ug ang mga adunahan, unsaon man nila pagtubag niini? Ug kadtong mga anaa sa tunga-tungang hut-ong? ■

RITO SA PAGSUGOD

Ang tanan nga imong gibuhath kanamo, O Ginoo, imong gibuhath uban sa tinud-anay nga paghukom, tungod kay nakasala kami batok kanimo ug sa wala magtuman sa imong mga sugo. Apan hatagi ug himaya ang imong ngalan ug pakigsandurot kanamo sumala sa pagkamadagayaon sa imong kalooy.

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

Pasiuna ug Pag-abi-abi

P: Mga igsoon: Sa pagsaulog nato niining misteryo sa gugma sa Dios, mag-ampo kita alang sa usag-usa: nga kita unta magtinguha sa paggakos sa Misteryo sa Pasko ni Jesus pinaagi sa paggakos sa kawsa sa mga kabus alang sa usa ka mas maayo nga kinabuhi; nga kita unta lig-on nga moingon dili! ngadto sa mga sitwasyon sa sala ug mga makasasalang katilingbanong istruktura; nga kita unta magdasig sa usag usa, diha sa panaghiusa, sa pagsanta sa dautan ug hiniusang pagtuboy sa tinuod nga maayo ug matarung.

Akto sa Paghinulsol

P: Mga igsoon: pangayoon nato karon ang gugma ug pasaylo sa Dios alang sa mga personal nga sala nga atong nabuhath ug alang sa atong pag-apil ug hilom nga partisipasyon sa mga istruktura sa sala sa atong katilingban.

P: Ginoong Jesus, kami nakasala batok kanimo, ug batok sa usag usa. Ginoo, malooy ka.

K: *Ginoo, malooy ka.*

P: Ginoong Jesus, kami misalmot sa mga katilingbanong istruktura sa sala pinaagi sa pagtugot sa sistema sa korapsyon diha sa among kahilom ug walay paglihok. Kristo, malooy ka.

K: *Kristo, malooy ka.*

P: Ginoong Jesus, nakasala kami pinaagi sa pagdumili sa pagdapit sa mga kabus

diha sa pakighiusa sa ilang pakigbisog alang sa mas maayong kinabuhi. Ginoo, malooy ka.
K: *Ginoo, malooy ka.*

P: Kaloy-an unta kita sa Dios nga makagagahum sa tanan ug pasayloon sa atong mga sala, dad-on unta kita niya ngadto sa kinabuhing dayon.

K: *Amen.*

Himaya sa Diyos didto sa langit...

Kolekta

P: Mag-ampo kita : O Dios, nagpadayag ka sa imong pagkagamhanan labaw sa tanan pinaagi sa pagpasaylo ug sa pagpakita ug kalooy, ihatag, kami naga-ampo, ang imong madagayaong grasya kanamo ug kadtong nagadali sa pagkab-ot sa imong mga saad himoa nga manununod sa bahandi sa langit. Kini among gipangayo pinaagi sa among Ginoong Jesukristo imong anak, nga buhi ug hari uban kanimo ug sa Espiritu Santo, Diyos nga usa hangtud sa kahangturan.

K: *Amen.*

LITURHIYA SA PULONG

Unang Pagbasa: Ezequiel 18: 25-28

L: Pagbasa gikan sa Unang Basahon Propeta Ezequiel

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Ezequiel 18: 25-28:

Ang pagpasaylo ug pagtubos mao ang mga sangputanan sa pagkakabig ug kausaban sa kasingkasing. Ang kamatayon mao ang usa ka sangputanan sa katig-a sa kasingkasing ug pagkawalay paghinulsol. Ang propeta nag-ingon: dili ang Dios ang naghukom ug nagsilot sa katawhan. Hinunoa, ang katawhan mao ang naghukom ug nagganti sa iyang kaugalingon sumala sa iyang mga pamaagi. Walay kalabutan dinhi ang pagkamanggi-angayon o dili manggi-angayon sa Dios. Walay kalabutan dinhi ang diyosnong interbensyon. Ang propeta nagsangyaw sa kaugalingnan sa tawo sa iyang relasyon

ngadto sa Dios. Ang mga lagda sa dula gilatid nang daan sa Makagagahum. Ang magdudula karon kinahanglan mo-papel sumala sa nauyonan nga mga lagda! (Aron sa pagwagtang sa mga komon nga pagtuo sa Israel nga ang ilang pagkabihag usa ka silot alang sa ilang nangaging mga sala, karon gipaila sa propeta ang ideya sa personal nga responsibilidad. Mahimo sa Dios ang paghatag sa bisan unsa nga angay sa usa ka tawo, buhi man o patay.)

Salmo Responsoryo: Salmo 25:4-5, 8-9, 10, 14

(Basahon gikan sa Kasulatan)

Komentaryo sa Salmo 25:

Usa kini ka alpabetong salmo sa pagsalig ug kompiyansa, nga may tonong makinaadmanon. Sa pasiuna (bb. 1-2a) gipahayag sa salmista ang bug-os niyang pagsalig ug kompiyansa sa Dios. Ang b. 2b mao ang hangyo sa salmista; bb. 2c -3 nagpalahi sa salmista gikan sa iyang mga kaaway, ug gipalugway ang ang kalainan tali sa mga nag-alagad sa Dios ug sa mga tawong nagbudhi kaniya ug sa iyang tinnguha. Unya ang salmista nagpaila sa iyang Dios: siya mao ang iyang magtutudlo, maloloy-on ug mahigugmaon. Ang elemento sa kinaadman mingdula: ang daan nga maloloy-on ug mahigugmaong Diyos makapasaylo sa mga sala ug mga kahuyang sa mga kabatan-onan. Ang iyang makinaadmanong pagtulun-an sa hustisya nagpakita sa iyang tawhanong kaayo ug katul-id. Siya mapahiubsanon ug nagtudlo siya sa salmista - ug sa mga katawhan - sa iyang mapaubsanon nga pamaagi.

Ikaduhang Pagbasa: Taga-Filipos 2: 1-11

L: Ang Pagbasa Gikan sa Sulat ni San Pablo ngadto sa mga Taga-Filipos

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Taga-Filipos 2: 1-11:

Usa kini ka malipayong sulat nga natawo sulod sa bilanggoan. Buot ni Pablo nga maabot kadtong mga Kristiyanong nakabig sa Filipos diha sa panaghiusa kang Cristo sa usag usa. Kini ang iyang kalipay! Ang tinud-anay nga kahiusahan nagagikan lamang sa diwa sa mapaubsanon pagka dili-hakog, o dili hinakog nga pagtagad sa uban isip sentro sa atong pagkatawo. Kining tiunay nga kahiusahan mahimo lamang pinaagi sa paglimas ni Jesus sa iyang kaugalingon ug sa iyang pagtabok sa tanang mga sangkoanan ug mga utlanan aron pagpakig-ambit sa labing hingpit sa kahimtang sa tawo. Gihimo ni Jesus kini sa bug-os nga pagkamasinugtanon ngadto sa Diyos! Ang pinakalawom nga kahimtang sa tawo nga iyang giambitan, sa pagsunod sa Amahan, mao ang kahimtang sa mga kabus ug mga timawa: ang ulipon, masinugtanon ug andam nga mamatay alang sa iyang gialagaran. Pinaagi niining mapahiubsanon paglimas sa kaugalingon, pagkahimong ulipon, masulundon bisan ngadto sa kamatayon sa krus, si Jesus gibayaw sa paagi nga gituboy siya pagbalik ngadto sa iyang langitnong identidad: Ginoo sa tanan, sama sa Dios nga Amahan ug, sa ingon, hinungdan sa iyang Himaya.

Berso sa Aleluya:

L: **Aleluya, aleluya.** R: **Aleluya, aleluya!** Ang akong mga karnero nakadungog sa akong tingog, nagaingon ang Ginoo; Ako nakaila kanila, ug sila nagasunod kanako! L: **Aleluya, aleluya.**

Ebanghelyo: Mateo 21:28-32

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: Himayaon ikaw, O Ginoo.

(Basahon gikan sa Kasulatan)

P: Ang Ebanghelyo sa Ginoo.

K: Daygon Ikaw, O Kristo.

Komentaryo sa Mateo 21:28-32:

Unsa ang Pilion: Ang pagkamasulundon sa Balaod o Kagawasan sa Gugma?

Nakadungog ka ba sa giingon ni Jesus: ang atong pagkamaayo ug pagkabalaan dili masukod pinaagi sa mga dayan-dayang panggawas ni sa pagkamasulundon sa balaod, kondili sa kun unsa man ang anaa sa sulod sa atong mga kasingkasing? Nakadungog ka ba kaniya nga nag-ingon kanato karon: ang importante alang kang Jesus dili ang atong pagsaulog sa panggawas nga ritwal sa pagtuo ug relihiyon, apan ang pagbuhat sa kabubuton sa Amahan, pagsunod kang Jesus, sa ang iyang pagkatiunay ug kalig-on, ug sa iyang pamaagi sa pagpuyo?

Wow, mabati mo ba kining tiunay nga tinguha sa atong mga kasingkasing? Nga ang importante dili ang inutok nga mga gitudlo sa pagtoo, ni naandang ritwal ni ang pagsunod sa titik sa balaod kondili ang gugma ug pagtahan nga gikan sa kasingkasing? Nga kita, uban sa atong Dios, wala matagbaw sa mga panagwaylamang ni sa mga buhat nga salingkapaw nga mabaw ug nagpabilin sa lansay lamang? Kay ang Dios, ug kita usab uban kaniya, nagtinguha ug usa ka tiunay nga relasyon sa Dios ug sa usag usa pinasikad sa tinud-anay nga pagtahan sa kaugalingon ngadto sa uban: sa paghigugma sa Dios gikan sa kasingkasing, ug sa pagbuhat sa hustisya sa atong silingan gikan sa atong mga mapasaligong kalag.

Sa pagkatinuod, ang mga kabus nga mga makasasala makausab sa ilang mga kasingkasing ug makakat-on sa paghigugma; apan ang pipila nga anaa sa gahum, maglisud sila sa pagsabut sa radikalidad sa gugma ug pagtahan sa kaugalingon. Kasagaran nila dili mag-usab; mas pilion pa nila ang kaharuhay sa balaod, ug ang gahum nga gihatag niini

ngadto kanila. Pagkamakalooloy gayud; ang ilang balaod dili makaluwas kanila; kay ang gugma ug pagtahan sa kaugalingon lamang ang makadala kanato ngadto sa Ginghamian sa Dios.

Wali: Ang Simbahan sa Kabus, pinaagi sa Gagmayng Simbahanong Katilingban, mosalmot sa Misteryo sa Pasko pinaagi sa mapainubsanon ug maalamon nga pagpalambo sa makihilabihang gugma pinaagi sa personal ug katilingbanong responsibilidad!

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
Ang Simbahan sa Kabus, pinaagi sa Gagmayng Simbahanong Katilingban, mosalmot sa Misteryo sa Pasko pinaagi sa mapainubsanon ug maalamon nga pagpalambo sa makihilabihang gugma pinaagi sa personal ug katilingbanong responsibilidad!	Ilha ang mga balaod, mga lagda ug regulasyon sa nasud, komunidad sa parokya ug GSK nga giisip nimo nga dili matarung. Nganong dili man sila matarung? Nasulayan na ba nimo silang ilisdan ug laing manggiangayon ug malumong balaod, lagda ug regulasyon? Unsa ang mg resulta?	“Dili mahimong dili magpakabana ang Kristiyano sa pag-antos ug sa kawalad-on, in-hustisya ug pagkabahin-bahin.” ...”Si Jesus walay sala apan gipasan niya ang atong mga pag-antos.” “... ang paghigugma lamang ug pagtahan sa kaugalingon ang magdala kanato ngadto sa ginghamian sa Dios.”

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon

Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo Katilingbanong Pag-ampo

P: Mga igsoon, uban sa dakong kalipay ug pasalamat, atong karon ibaling ang atong kaulingon ngadto sa atong Langitnong Amahan aron tabangan kita niya sa pag-ambit sa pag-antos, kamatayon ug pagkabanhaw sa Iyang Anak nga si Jesus. Sa matag pag-ampo ang atong tubag: Ginoo, lig-ona kami sa imong gugmang radikal.

T: *Ginoo, lig-ona kami sa imong gugmang radikal.*

L: Mag-ampo kita alang sa Simbahan: nga isip Simbahan sa Kabus sa tibook kalibutan, Siya unta magsangyaw ug maggiya isip panig-ingnan sa kalipay sa pagpakig-ambit sa Misteryo sa Pasko ni Jesus pinaagi sa hugot nga pag-ingon “Dili’ sa atong makasasalang kaugalingon ug makasasalang mga istruktura, ug sa pagtambayayong sa mga alantuson sa matag usa diha sa gugma.” Mag-ampo kita sa Ginoo.

T: *Ginoo, lig-ona kami sa imong gugmang radikal.*

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip

Katawhan sa Dios: nga ila untang gakson ang pag-antos, kamatayon ug pagkabanhaw ni Jesus alang sa tinguha sa gugma sa Dios, kaangayan ug kalinaw pinaagi sa pagsalikway sa ka-walay pagpakabana sa pag-antos ug kawalad-on, in hustisya ug pagkabahin-bahin. Mag-ampo kita sa Ginoo.

T: *Ginoo, lig-ona kami sa imong gugmang radikal.*

L: Alang sa tanang pangulo sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga sila magpadayon sa pagpalambo ug pagpanalipod sa kaayohan sa tanan, ilabina sa mga magdadagat, pinaagi sa pagmugna sa mga istruktura sa grasya nga nagbuntog sa dautan pinaagi sa maayo, nga nagtugot sa katawhan sa pakig-ambit sa mga alantuson sa usag-usa diha sa katarung, panag-angay ug sa dungog, sa kamad-an, kadagatan ug sa kalangitan. Mag-ampo kita sa Ginoo.

T: *Ginoo, lig-ona kami sa imong gugmang radikal.*

L: Alang kanatong tanan, mga lumulupyo sa kalibutan ug sakop sa kalangitan: nga magdinasigay unta kita sa pag-ila sa mga malinglahong paagi sa sala diha sa atong pagpangita ug kaharuhay ug kahingpitang personal, ug bahandi, gahum ug dungog, ug, hinonoo, sa pagpangita sa hingpit nga kalipay diha sa pagpihig sa maayo ug sa kaayohan sa uban, ug dili sa kaugalingon. Mag-ampo kita sa Ginoo.

T: *Ginoo, lig-ona kami sa imong gugmang radikal.*

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: *Ginoo, lig-ona kami sa imong gugmang radikal.*

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) Mag-ampo kita sa Ginoo.

T: *Ginoo, lig-ona kami sa imong gugmang radikal.*

P: Ginoong Dios, pamatia ang mga pag-ampo sa imong matinud-anong katawhan nga nagkatigum libot sa imong halaran. Uban sa radikal nga gugma sa imong Anak, hinaut nga kami makakaplag sa kahingpitan sa kahulugan ug direksyon sa kinabuhi diha sa pagpakig-ambit sa iyang pag-antos, kamatayon ug pagkabanhaw alang sa tinguha sa imong Ginghamian. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kаланon sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot;

alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Itugot kanamo, O maloloy-ong Dios, nga kining among halad madawat nimo ug pinaagi niini ang tuburan sa mga panalangin mabuksan alang kanamo. Pinaagi kang Kristo among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, O Ginoo, santos nga Amahan, labawng makagagahom ug walay-kinutubang Diyos.

Kay pinaagi sa iyang pagkatawo iyang gibag-o ang katawhan gikan sa napukan nga kahintang, ug pinaagi sa iyang pag-antos, gipapas ang atong mga sala; pinaagi sa iyang pagkabanhaw gikan sa mga patay giablihan niya ang dalan ngadto sa kinabuhing dayon, ug pinaagi sa iyang pagsaka nganha kanimo, O Amahan, iyang gibuksan ang ganghaan sa langit.

Ug busa, uban sa panon sa mga Anghel ug mga Santos, kita nag-awit sa himno sa imong himaya, sa walay hunong sa pag-ingon:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitasaan. Dayegon ang nagaanhi sa ngalan sa

Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Sa among pagkaon niining tinapay, ug pag-inum niining kalis, among gimantala ang imong kamatayon, O Ginoo, hangtud nga ikaw mobalik pag-usab.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang gingharian/ ug ang gahom ug ang himaya/ hangtod sa kahangturan.

P: Ginoong Jesukristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tanawa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Antipona sa Pagpangalawat:

Pinaagi niini kita nakaila sa gugma sa Dios: nga gi-ula ni Kristo ang iyang kinabuhi alang kanato; mao nga kita kinahanglang moula usab sa atong kinabuhi alang sa usag-usa.

Pag-ampo Human sa Pangalawat

P: Mag-ampo kita: Hinaut nga kining langitnong misteryo, O Ginoo, mopasig-uli kanamo diha sa hunahuna ug lawas, nga kami mahimong manununod sa himaya

uban ni Kristo, kang kinsang pag-antos kami nahiusa sa matag higayon nga kami magsangyaw sa iyang Kamatayon. Kinsa buhi ug nagahari hangtod sa kahangturan.
K: Amen.

Katapusang Panalangin:

P: Ang Ginoo maanaa kaninyo.

K: Maanaa usab kanimo.

P: Moduko kita ug atong dawaton ang bendisyon sa Ginoo: Unta ang imong matinud-anonong katawhan magmaya, naga-ampo kami, O Ginoo, nga tinuboy sa imong toong kamot, ug, ma-uswagong diha sa Kristohanong kinabuhi, sila unta maglipay sa maayong mga butang karon ug sa panahon nga umaabut. Pinaagi kang Kristo among Ginoo.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

P: Panglakaw kamo sa pakigdait, himayaa ang Dios pinaagi sa inyong kinabuhi.

K: Salamat sa Dios. ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang gospelbreak.wordpress.com. o pinagi sa inyong smartphone o tablet i-swipe kini nga QR code.



Ang Simbahan sa Kabus, pinaagi sa Gagmayng Simbahanong Katilingban, mosalmot sa Misteryo sa Pasko pinaagi sa mapainubsanon ug maalamon nga pagpalambo sa makihilabihang gugma pinaagi sa personal ug Katilingbanong responsibilidad!

Please help us continue publishing this Missalette with your donation.

Any amount is appreciated no matter how small.

Thank you!

Account Name:
Communication Foundation for Asia
Metrobank V-Mapa, Sta. Mesa,
Manila Branch:
SA# 3306-509-480
BDO Old Sta. Mesa Road, Manila Branch:
SA# 7090-042-836

Please fax deposit slip to 713-2736
We are located at # 4427 Old Sta. Mesa St.,
Sta. Mesa, Manila